



## Mpango wa Ukombozi

**K**wa kuwa uweza wake wa Uungu umetukirimia vitu vyote vipasavyo uzima na utauwa, kwa kumjua yeye aliyetuita kwa utukufu wake na wema wake mwenyewe. —2 Petro 1:3.

Ulimwengu wa Kikristo unao uelewa hafifu mno wa mpango wa ukombozi. Mwanadamu, anavyofundishwa sasa na watu wanaodai kuyafahamu Maandiko, kamwe hawezi kujua ukubwa wa anguko lake, na hali yake ya chini; lakini utume wa Kristo utaufunua ukweli kama ulivyo ndani ya Yesu. Mwanadamu anaweza kujua kina ambacho kwacho amezama tu kwa kuutazama mnyororo wa ajabu wa ukombozi uliotumiwa ili kumvuta nje. Ukubwa wa kuharibiwa kwetu unaweza kutambuliwa tu katika nuru ya Mungu iliyooneshwa kwenye msalaba wa Kalvari. Mpango wa pekee wa ukombozi unaweza kutambuliwa tu katika kifo cha Yesu.

Ulimwengu kwa hekima yake wenyewe hauwezi kupata kumjua Mungu wa kweli na aliye hai kwa usahihi. Kristo alipokuja katika ulimwengu huu, akiuvika Uungu Wake kwa ubinadamu, jinsi alivyotendewa na mamlaka kuu ya taifa lililodai kumjua Mungu, kulidhihirisha kikamilifu nguvu ya hekima na akili ya kibinadamu. Akili yao haikuweza kuunda wazo sahihi juu ya Mungu kupitia njia na kazi Zake.

Mwanadamu anaweza kuiishi sheria kwa njia tu ya kumwamini Yesu Kristo. Mwanadamu hawezi kujiokoa mwenyewe, bali Mwana wa Mungu hupigana vita vyake kwa ajili yake, na anamweka mahali pafaapo kwa kumpatia sifa Zake takatifu. Na mwanadamu anapopokea haki ya Yesu, anakuwa mshirika wa asili ya Mungu. Anaweza kuzitunza na kuziishi amri za Mungu. Petro anasema: ... "Tena kwa hayo ametukirimia ahadi kubwa mno, za thamani, ili kwamba kwa hizo mpate kuwa washirika wa tabia ya Uungu, mkiokolewa na uharibifu uliomo duniani kwa sababu ya tamaa."

Ukweli kama ulivyo ndani ya Yesu ni utii kwa kila kanuni ya Yehova. Utakaso wa Biblia sio utakaso wa bandia ambao hauwezi kuyachunguza Maandiko, lakini utaweka tumaini kwenye hisia nzuri na msisimko badala ya kuutafuta ukweli kama hazina iliyositirika. Utakaso wa Biblia utamwongoza aliyetakaswa nao kujua matakwa ya Mungu na kuyatii. Kuna mbingu safi na takatifu ambayo imewekwa tayari kwa ajili ya wale wanaozitunza amri za Mungu. Inastahili uzima, ustahimilivu, na juhudi zisizochosha. Shetani yuko mkono wako wa kuume na wa kushoto; yuko mbele yako na nyuma yako. Huzigawia udanganyifu wake roho ambazo haziutunzi ukweli kama ulivyo ndani ya Yesu. Yeye, mwangamizaji, yu juu yako ili kufanya kila juhudi zako kupooza. Lakini kuna taji ya uzima inayopaswa kutwaliwa, maisha yale yenye upatanifu na maisha ya Mungu. Na wale ambao hawafungi mioyo na akili zao kwa usadikisho watajifunza kile upendo wa Mungu mtakatifu na mwenye haki ulivyo; kwa maana ni kanuni ya kushangaza, ifanyayo kazi kwa namina ya ajabu na kushangaza ili kuipatia jamii ya wanadamu wokovu (The Review and Herald, Februari 8, 1898).